



ATASSUT INATSIARTUNI

ATASSUT

UKA 2013/37-1

Siverth K. Heilmann

10.10.13

2014-mi atuutilersussamik Kangaatsiamiit Qaanaaq angullugu upernaakkut appanniarsinnaaneq 01. september-imiit - 29. februar-imut atuuttup, ukiukkut sikuusarnera pillugu tamakkiisumik malitsinneqarsinnaanngitsup naleqqussarnissaa pillugu upernaakkut appanik piniarsinnaanerup maajip qeqqata tungaanut sivitsorneqarnissaanik, Naalackersuisut sulissuteqaqqullugit Inatsisartut aalajangiiffigisassaattut siunnersuut.
(Inatsisartunut ilaasortat Gerhardt Petersen aamma Siverth K. Heilmann, Atassut)

ATASSUT-mit erseqqissassavarput pingaartilluinnaratsigu nunatta pisuussutai uumassusillit piujuartitsinissaq tunngavigalugu atorluarneqassasut.

Taamatuttaaq pingaartitsigaarput sumiiffinni uumasut najuunnerini innuttaasut piniarsinnaanissaat sapinngisamik annerpaamik qulakkiissallugu.

Taamaammat ilisimatuut innersuussutigisartagaat ataqquilluinnaraluarlugit aalisarnermik piniarnermillu inuussutissarsiuteqartut sunngiffimminnilu pinaluttartut misilittakkatik ilisimasatillu tunngavigalugit uumasut killilersugaasut qanoq qaqugukkullu piniarneqarsinnaanissaannik piumasqaqartarnerat imminnut oqimaalutarniartuaannarpavut.

Matumani nalunnginnatsigu Kangaatsiap nalaaniit Qaanaap tungaanut appat ingerlaarneranni piniartut pisaqarsinnaanerat sumiiffinni amerlanerpaani ajornartoq ilisimavarput, tamannalu iluarsiivigerusullugu manna siunnersuut saqqummiupparput.

Pinngortitaleriffiup misissuisimanani aammalu kaammattuutini tamanut siammarteqqammerpai. Atuagaq qiimmaallannngilaq, ingerlaannarlu paasinarpoq nalilersugassat imaannaanngitsut tikkuartorneqartut.



ATASSUT INATSISARTUNI

Appanik unioqqutitsilluni piniartarneq aammalu piniapilunneq appat ikileriarujussuarsimaneragaanerannut pissutaatinneqartoq annerpaaq ATASSUT-mit assut paatsuunganartipparput, taamak qulanngitsigaluni avammut nalunaarsinnaagaanni uppernarsaateqartoqarsimassaaq, takussallugit soqutiginarunik.

Matumanilu Naalakkersuisut ATASSUT-mit piumaffigissavagut unioqqutitsisoqartarneranerup ilumuussusianik uppernarsaataasunik saqqummiusseqqullugit.

Allali pissutaatinneqartoq, tassalu silaannaap allangornerata kingunerisaanik pinngortitap allangorneratigut appat issittormiut ikiliartulersimaneragaanerat immini tikkuussivoq issittumi nunami uumaniarfiit immallu sarfaata allangorneratigut uumasut ingerlaartarfii pillugit ilisimatusarneq annertusineqartariaqartoq.

ATASSUT-mit ilisimavarput silaannaap allangornerata kingunerisaanik ilaatigut appat timmissallu allat ininnaatik qimallugit allani ininnaaqalernikumumata, taamatuttaaq sikuusarunnaariartornerata kingunerisaanik appat avannamut ingerlaartarnerat maluginiagassaavoq pingaarutilik.

Taamatuttaaq kilisaatit umiarsuillu imartatsinni ingerlaarneranni, pingaartumik taartumi qinngortaait ikumanerini timmiarpasuit pjarisoorneqartarput, tamannalu aamma qangaaniilli manna tikillugu ilisimaneqarpoq.

Timmissat pillugit nalunaarutip allangortinneqarnissaa Pinngortitaleriffiup innersuussutai tunngavigalugit pilertornerusumik suliarineqassasoq aammalu timmissat pillugit suleqatigiissitamik innersuussisussamik pilersitsisoqassasoq Naalakkersuisut ilimasaaripput.

Siunnersuutitsinnik saqqummiisoq ilumoorpoq tikkuaramiuk sikusarnera pissutaalluni piffissap appanniarsinnaatitaaffiup iluani appanniarnissamut periarfissat sumiiffippassuarnut naapertuutinnigisoq, tamannalu aaqqiivigineqartariaqarpoq.



ATASSUT INATSIARTUNI

ATASSUT-mit erseqqissaatigissavarput kissaatigigatsigu piffissaq piniarfiusinnaasoq sumiiffinnut naapertuuttumik aqqissorneqassasoq, ukiup kaajallakkiartornerani kalaaliminernik assigiinngisitaartunik isumalluuteqarsinnaanermik atuisinnaaneq kinguaariit akornanni periarfissaajuartariaqarmat, aamma appat eqqarsaatigalugit.

Appanniarsinnaanerup periarfissaaginnarnissaa tamatta siunnerfigisariaqarparput, Pinngortitaleriffiup kisitsisaatai paasisstissaataalu nalilersorluarneqartariaqarput, piniartut ilisimasaat piaartumik ataatsimut katersorneqartariaqarput imminnullu sanillersuullugit.

Kangaatsiamiit avannamut Qaanaap tungaanut appanniartarnerup sivitsorneqarnissaa ATASSUT-mit matumani piumasaaqatigaarput, nalunnginnatsigu pinngortitap pissusaata timmissat immi illersorneqarnissat isumagereeraa, assersuutigiinnarlugu kaperlaap nalaani sikuusarneranilu piniartoqarsinnaaneq ajormat.

Taamatut oqaaseqarluta ATASSUT-mit inassutigissavarput siunnersuut akuersaartumik suliarineqassasoq aappassaaneerneqartinnagu Inatsisartut Aalisarnermut, Piniarnermut Nunalerinermullu Ataatsimiititaliaanut suliassanngortinneqassasoq.